

Von der Form dieses neuen Büchsen
sen Quadrants.

Die rechte Form vnd Gestalt vnd des neuen Büchsen
Quadrants/wird dir hie in der Figur beynah in seiner
rechten größe vorgebild. Er ist zugericht von Messing/
vnd vbergült/das Magnetkästlein henckt frey/ vnd schwebt auff
vnd ab/nach dem man es bedarff/hat auch zween Arm oder Flü-
gel/jeder biß auff 50. Grad/innwendig abgetheilt/vnd in mitten
der Theilung ein Grüblein voll Wachs/davon der Gebrauch
hernach angezeigt wird.

Das Magnetkästlein ist innwendig vnter der Nadel in 64.
kleine Theil abgetheilt/mit der Zahl 4. 8. 12. 20. vnd hat auch
vmb vnd vmb ein Grüble voll Wachs.

Es hat auch dieser Quadrant vnden 3. Löchlein/mit Nume-
ro. 1. 2. 3. verzeichnet/so zum Absehen dienen/Hat auch ein Per-
pendicul mit ein Faden bey A. vnd oben auff ein gemein Son-
nen Uhr von Morgens vmb 6. Uhrn/biß des Abends vmb 6.

C A P. V I I.

Wie man mit diesem Büchsen Quadrant das
groß Geschütz bey Tag vnd Nacht recht rich-
ten/vnd damit gewiß schießen sol.

Da dann ein Stück Geschütz mit seiner gebürlichen La-
dung/wie vorn Cap. v. gelehrt/recht geladen ist. So sol
man achtung geben/das die Büchse recht stehe/vnd das
nicht ein Rad höher als das ander stehe/Solches kan man bald
erfahren/da man diesen Quadrant auff der Büchsen/hindern
beym Zündloch/gerad auff die Mittel Lini auffsetzt/dann so ein
Rad höher seyn sol/als das ander/so sol der Faden mit dem Per-
pendicul oder Bley Wagen/nicht gerad auff sein Püncklein A.
fallen/also das eins höher/das ander nidriger muß gesetzt wer-
den!